

NAALAKKERSUINIKKUT

ANGUNIAKKAT

2009-2013



SIK

***SULINERMIK INUUSSUTISSARSIUTEQARTUT
KATTUFFIAT***

**Qaortumi 2009 ataatsimeersuarnermi ilanngussat aappaluttunik naqin-
neqarput.**

IMARISAI		
<i>Kap.</i>		<i>Qupperneq</i>
	Aallaqqaasiut	3
	Kattuffimmut tunngasut	4
1	Anguniagaq pingaarneq	6
2	Inuiaqatigiit pillugit anguniagaq	6
3	Sulinermik inuussutissarsiuteqartut atugarisaat	7
4	Inunnik isumaginninneq	8
5	Inissaqarniarneq	8
6	Peqqinnissaq	10
7	Suliffissaqartitsineq	10
8	Inuussutissarsiorneq	10
9	Ilinniartitaaneq	10
10	Ingerlatseqatigiiffissuit inuiaqatigiinnit pigineqartut	11
11	Naalagaaffeqatigiinneq	12
12	Qinersisarnermi inatsit	13
13	Namminersulernissaq	13

AALLAQAASIUT.

Sulineramik Inuussutissarsiuteqartut Kattuffiata SIK-p naalackersuinikkut anguniagai kattuffiup nuna tamakkerlugu ataatsimeersuarnerani 2005-imi ingerlanneqartumi aalajangersarneqaqqaarput, kingorna 2009-mi ileqquusumik ataatsimeersuarnermi ilassuteqartinneqarlutik. Naalackersuinikkut anguniakkat tulliani kattuffiup ileqquusumik 2013-mi ataatsimeersuarnissaata tungaanut suliniutigineqasassasut april 2009-mi akuersissutigineqarput.

SIK ullumikkut nuna tamakkerlugu sulineramik inuussutissarsiuteqartunut 10.000-inut kattuffiuvoq, inuiaqatigiinni pingaarutilimmik sunniuteqartumillu inissisima-soq.

Kalaallit Nunaanni naalackersuineri ingerlatseriaatsimi kattuffik tusarniaaffigineqartarnermigut sunniuteqarpoq; aammalu qinikkanut pisortanullu attaveqarluarnermigut naalackersuinikkut anguniakkat ilaasortarpassuarminit suliniutigeqquneqartut piviusunngortinniarlugit sunniiniartarluni.

Kattuffimmut tunngasut

Sulinermik Inuussutissarsiuteqartut Kattuffiat SIK 1956-imi pilersinneqartoq, ukioq 2005-imi 10.000-nik ilaasorta qarpoq, maannakkut 25-nik immikkoortorta qarfeqarluni, inoqarfinnilu tamaginni suliffeqarfippassuarni 100-it arlerlugit sinniisoqarluni.

Kattuffiup ileqquusumik ataatsimeersuarnera ukiut sisamakkaarlugit ingerlanneqartartoq 40 missaanni taaseqataasinnaasunik, taamalu amerlatigisunik alaatsinaattunik, qaaqqusanik sulisorisanillu peqataaffigineqartarpoq.

Ataatsimeersuarnerit akornanni ukiut tamaasa Nakkutilliisoqarfik kattuffiup siulersuisuunerinit immikkoortorta qarfiillu aallartitaannit peqataaffigineqartoq aalajangersaaffiusinnaalluni ingerlanneqartarpoq.

Kattuffiup siulersuisuuneri quligiluanik ilaasorta qarpoq ileqquusumik ataatsimeersuarnermi qinerneqarsimasunik.

Ulluinnarni aqutsisut, tassaasut siulittaasoq siulittaasullu tullia kattuffiup allaffeqarnikkut qullersaqarfiani atorfigivillugu sulisarput.

Kattuffiup allaffeqarfia Nuummiittoq qulit missaannik sulisoqarpoq, 2005-milu aallarnerfigalugu aningaasarsiornermik naalackersuinermillu allaffeqarfik iliniarsimasunik sulisulik pilersinneqarpoq.

Immikkoortorta qarfiit amerlanerpaat ulloq naallugu sulisulinnik allaffeqartiterput.

Kattuffik toqqaannartumik uku siulersuisuini sunniuteqarnerpaalluni peqataavoq:

- Sulisartut Højskolia
- Qaammarsaanermut Ilinniartitaanermullu Aningaasaateqarfik
- Sulinnigiffeqarnermi Angalanermut Aningaasaateqarfik
- Suliffissanik pilersitsiniarnermi Aningaasaateqarfik
- Soraarnerussutisiaqalernissamut Aningaasaateqarfik SISA

Taakku saniatigut SIK ataatsimiisitaliani, nævnini, rådini sinniisuuffinnilu allani pisortat suliffeqarfissuillu isumagisaanni ilaasorta affeqarpoq, soorlu aamma Inuit Issittormiut Kattuffianni ilaasortaasoq.

SIK nunani avannarlerni sulisartut suleqatigiiffianni aamma nunani avannarlerni sulisartut kattuffissuisa suleqatigiiffianni ilaasorta affeqarpoq, kiisalu Qallunaat nunaanni sulisartut kattuffissuunik qanittumik attaveqaateqartiterluni

Kattuffiup taama aqqissuussaaneqarluni attaveqaateqarlunilu suliassaasa pingaartut ilagaat ilaasortat akissarsiaasa suliffimmilu atugarisaasa sulisitsisunut isumaqatigiinni arnerit aqutugalugit pitsangorsarnissaat, taamaaliornikkut inuiaqatigiinni pisuussutit innuttaasunut naligiinnerusumik agguataarneqarnissaat qulak-

kearniarlugu; sulisartullu suusupagineqaratik inuttulli allatut ataqqinassuseqarlutik inuiaqatigiit ineriartortinneqarneranni peqataatinneqarnissaat, suliffigisaminnilu torersumik toqqissisimanartumillu atugassaqartinneqarnissaat qulakkiissallugu.

Ilaasortat atugarisaat pitsanngorsarniarlugit inuiaqatigiinnilu naligiinnginnerup annertusiartorani annikillisarneqarnissaanik suliniuteqarnermi kattuffiup qullersani, immikkoortorta qarfini sinniisunilu peqatigalugit piareersimavoq sulisartoqarnerup iluani sakkussat atorneqarsinnaasut tamaasa aqutigalugit siunniussaminik angusaqarniassalluni.

1. Anguniagaq pingaarneq

1.1.

Sulinermik Inuussutissarsiuteqartut Kattuffiata SIK-p anguniagaa pingaarneq tassaavoq: Ilaasortat akissarsiaat naleqarnerulersinniassallugit, suliffissaqartinnissaat qulakkeerniassallugu, kiisalu suliffissaarunnermi, napparsimanermi utoqqalinermilu inuttut ataqqinassusiagaanatik toqqissisimanartumik atugassaqartinneqar-nissaat isumagissallugu.

2. Inuiaqatigiit pillugit anguniagaq

Nunarput siunissami uatsigut ingerlali!

2.1.

Kalaallit Nunaat namminersortoq SIK-p pingaartillugu tamatigut ajunngin-nerpaamik angusaqarnissaa periarfissani tamaasa atorlugit suleqataaffigissavaa.

2.2.

Kalaallit oqaatsitta pingaarnertut oqaatiginiarneqartarnerat kisiat killiffiginagu, inuiaqatigiilli ingerlatitaaneranni, ilinniartitaanermi, allaffissornermi aningaasar-siornermilu kalaallit oqaatsivut qitiutillugit atorneqassapput.

2.3.

Nunatsinni pissusiviusut aallaavigalugit inuiaqatigiit naalackersuinikkut, allaffis-sorluni aqutsinikkut, aningaasarsiornikkut aqqissuunneqassapput.

2.4.

Inuiaqatigiit kalaallit nunarsuarmioqataasutut, immikkuullarissumik oqaluttuari-saaneq najugaqarnerlu aallaavigalugit ilisarnaateqartutut, inuiattut nammineersin-naasutut niuernikkut ilinniartitaanikkullu nunarsuarmioqagiinnut nallersuussin-naasutut, suleqateqarsinnaasutut unammillersinnaassuseqartutullu inissisimalersit-tariaqarput.

PIFFISSAMI QANINNERUSUMI ANGUJUMASAT

3. Sulinermik inuussutissarsiuteqartut atugarisaat

3.1.

SIK-p suleqataaffigiussavaa sulinermik inuussutissarsiuteqartut atugarisaasa inuiaqatigiinni agguaqatigiissillugu atugassarititaasunit appasinnerujunnaarnissaat, paarlattuanilli inuiaqatigiinni innuttaasunut tamanut periarfissat inuuniarnermilu atugassarititaasut naligiinnerulernissaat.

3.2.

Sulisartut akissarsiaasa isumaqatigiinniarnikkut angusat pisissutigineqarsinnaaneria akileraarutinit, akitsuutinit inuuniarnermilu pinngitsoorneqarsinnaangitsut akiisa qaffatsinneqarnerinit mangiarneqannginnissaat pisortanut isumaqatigiissutigisariaqarpoq.

3.3.

Ukiorpassuarni kingornuttakkatut Nunatsinni atuuppoq innuttaasut aalisarnermik piniarnermillu tamakkiisumik inuussutissarsiuteqanngikkaluarlutik sunngiffiminni saniatigooralugu pinalukkumasarnerat. Tamanna pingaartumik inuiaqatigiinni akissarsiakinnerusut inuuniarnerminnut iluaqutigalugu tapertarisarpaat. Taamaattumik aalisakkanik piniakkanilluunniit killilersuisoqartillugu saniatigooralugu sulisartut pinalussinnaanerannik arsaartorneqartariaqanngillat.

3.4.

Suliffinnik isumannaallisaaneq sapinngisamik tamanut atuuttumik sukatertariaqarpoq, suliffeqarfiit ilaasa isumannaallisaanikkut piumasaqaatinik suusupaginnittarnerat unitsikkumallugu.

3.5.

Sulitilluni ajoqusertoqartillugu akisussaaffiup piaartumik inissinneqartarnissaa aqutissiuuttariaqarpoq, kiisalu sulitilluni ajoqusertup taarsiivigineqarnissaanut piffissaq sivikillineqartariaqarpoq, sulisitsisullu tungaaniit pisussaaffik annertusineqartariaqarluni.

3.6.

Sulinermik inuussutissarsiuteqartut sulisitsisuminnit eqqunngitsumik tunngaveqartumik soraarsitaasut inatsisitigut illersorneqarnerat annertusartariaqarpoq, sulisitsisullu unioqqutitsillutik soraarsitsisut sakkortuumik pineqaatissinneqalertariaqarput.

4. Inunnik isumaginninneq

4.1.

Inuiaqatigiinni inunnik isumaginninnermi siunertarinqassaaq innuttaasut suliffissaarunnerup nalaani, utoqqalineq, naartunerup meerartaarnerullu nalaani, napparsimaneq innarluuteqarnerluunniit pissutigalugit naliginnaasumik suliffeqarnikkut isertitaqarsinnaanngikkallarnerup nalaani, toqqissisimanartumik inuttullu ataqqi-nassusiagaanertaqanngitsumik atugassaqartitaanissaat qulakkiissallugu.

4.2.

Isuma tamanna aallaavigalugu inunnik isumaginninnermi aaqqissuussineq ingerlanneqartariaqarpoq equngassutaasinnaasut ippinnarsinnaasullu allat piujunnaartinneqarnissaat siunertaralugu.

4.3.

Suliffissaarunnermi napparsimalernermiluunniit sulinnngikkallarnerup nalaani annertussusileriikkanik ikiorsiissuteqartitsineq aaqqissuuteqqinneqartariaqarpoq, pi-sartakkallu aningaasat naleerukkiartornerat peqatigalugu ineriartortinneqartariaqarlutik.

4.4.

Inunnik isumaginninnerup iluani sulisitsisut pisortaappata namminersortuuppataluunniit inatsisiliornikkut pisussaaffilerneqarnissaat anguniartariaqarpoq, suliffeqarfiup suliaasaarukkallarneq tunngavigalugu sulisuminut akissarsiasatigut annaasaqartitsiffiusumik sulisitsisumulli pisussaaffiliinngitsumik angerlartitsiinnar-tarnerup qimanneqarnissaa qulakkeerumallugu. Tamanna tunngavigalugu sulisitsisut, pisortaagunik namminersortuugunilluunniit annertussusileriikkamik ikiorsiissutinut aningaasaleeqataasalernissaat inatsisiliuunneqartariaqarpoq.

4.5.

Sulinermik inuussutissarsiteqartut soraarnerussutisiaqalernissamut toqqorterisineqarnerat isumaqatigiissutit tunngavigalugit ineriartortinneqartoq sapinngisamik piaarnerpaamik naammassillugu ineritittariaqarpoq, atorfillit allat soraarnerussutisiaqalernissamut akiliutigisartagaattut nallersuuttunngortillugit.

4.6.

Utoqqalinersiutit pisortat tunniuttagaat aningaasap naleerukkiartornera ilutigalugu ineriartortinneqartariaqarput.

4.7.

Utoqqalinersiutit pisortat tunniuttagaat ikilisinneqartassanngillat sulisartup nammineq suligallarnermini soraarnerussutisiaqalernissamut katersaqarnera pissutigalugu.

4.8.

Aappariit utoqqalinersiuteqalernissamut piginnaatitaasut aappaata killissarititaa-sunit qaffasinnerusunik isertitaqarnera pissutigalugu utoqqalinersiutaanik piiaaf-figineqartarnera atorunnaarsinneqartariaqarpoq.

4.9.

Utoqqalinersiutillit utoqqalinersiutiminnik ilanngartuunneqaratik saniatigut iser-tissinnaasaasa ukioq 2005-imi killigititaasut marloriaatinngortinneqartariaqarput.

5. Inissaqarniarneq

5.1.

Nunami maani innuttaaqataasut – aamma sulisartut – toqqissisimanartumik anger-larsimaffeqarnissartik piginnaatitaaffigaat. Taamaattumik inissaaleqineq sakkortu-nerpaamik akiorniarneqartariaqarpoq.

5.2.

Inissialiortiternermi/illuliortiternermi sulisartut akilersinnaasaannik, nalignnaasu-millu pitsaassusilinnik sanaartortoqartariaqarpoq.

5.3

Toqqissisimanartumik angerlarsimaffeqarnissaq pisariaqavippoq ilaqtariinni meerartaasut toqqissisimanartumik avatangiiseqarlutik peroriartornissaat kikkuu-galuartulluunniit pisariaqartimmassuk.

6. Peqqinnissaq

6.1.

Inuiaqatigiit aqqissugaaneranni innuttaasut kikkuugaluartulluunniit peqqinnissa-qarfimmi akeqanngitsumik isumagineqarsinnaatitaanerisa innarlerneqannginnis-saat aalajangiusimaneqartariaqarpoq.

7. Suliffissaqartitsineq

7.1.

Inuussutissarsiortitigut piorsaanermi nunaqavissut sulisussatut piukkunnarsarlu-gillu ilinniartinneqarnissaat pisariaqarpoq, pikkorissartitsinerit ilinniartitseqqiine-rillu aqqutigalugit.

7.2.

Suliffissanik ataavartunik pilersitsiniarnermi nunaqavissut sulisussatut piareersar-tinneqartarnissaat aqqissuuttariaqarpoq, suliffissanik pilersitsiniartoq namminer-sortuuppat pisortanilluunniit ingerlataappat apeqqutaatinnagu.

7.3.

Sulisussanik avataanit tikisitanik inuiaqatigiit pisariaqartitsinerat pilersaarusiorkuakkamik annikillisikkiartuaartariaqarpoq – ammip qalipaataanik assigiinngisitsineq tunngaviginagu – kisiannili maani nunaqavissut suliasanut inuiaqatigiit pisariaqartitaannut tamaginnut piukkunnarsarneqarlutik atorluarneqalernerisigut tikisitanik pisariaqartitsinerup annikilliartuaartinneqarneratigut. Tamannami pingaaruteqarpoq inuiaat kalaallit nunaminni inuiaqatigiittut nunarsuarmioqataasutut allanillu ittuukulutsitaanatik, sulisussatullu narrugisaanatik suliasaminnut piukkunnarsarluarsimallutik qiimallutik sulisinneqalernissaat.

7.4.

Inuusaatsitta kulturittalu innarlerneqannginnissaa siunertaralugu inatsisiliornikkut avataaniit suliarortut nunaqavissuninngarnit amerlanerulinnginnissaat qulakkeerneqassaaq.

8. Inuussutissarsiorneq

8.1.

Aalisarnerup, piniagassanik iluaquteqarniarnerup, pisuussutinillu uumassusilinnik imaanit nunamiillu pisunit suliffissuaqarnikkut tunisassiorfeqarnerup saniatigut takornariartitsinerup aatsitassarsiornerullu ineriartortinneqarnerani suliffissat atavartut pilersiororneqarnissaat SIK-p peqataaffigiumavaa. Tamakku saniatigut nunami suliffissat atavartut allat, soorlu Nunatta pissarititaanik aallaaveqarluni tunisassiorfeqqat, atortussiassanilluunniit avataanit annertuunngorlugit piariigaa-tinnagit tikisitanik suliareqqiisarfinnik pilersitsisoqartariaqarpoq.

8.2.

Tamatumanili ukiup kaajallakkiartornerani silap pissusia aallaavigalugu suliffissat sulisussanut naleqqussarneqarnissaat pisariaqarpoq, sulisorineqartussat pikkorisartinneqarlutillu ilinniarteqqinneqartarnissaat kisiat pinnagu, aammattaarli ukiup qanoq ilinera pissutigalugu suliasaarukkallartarnerup sulisorisat suliffeeruttarnerannik, taamaalillunilu isertitatigut annaasaqartarnerat pinngitsoortinniarlugu allatut aqqissuussisoqartariaqarluni.

8.3.

Sanaartornermi, aqquserniornermi atortorissaarusersornermilu Nunatta qanoq ituunera silallu pissusia aallaavigalugit pilersaarusiortoqartarnissaa, sulisussanillu nunaqavissunik pilersaarusiorkuakkamik ilinniartitsisoqarlunilu atuisoqarnissaa qulakkeerneqartariaqarpoq.

8.4.

Suliffeqarfinnik siuliani taakkartorneqartunik pilersitsiornermi ingerlataareersulluunniit piginnittunut nutaanut tuniniarneqarnerini nunaqavissunik piukkunnarsaaneq aqutigalugu suliffeqarfiit nunaqavissunit pigineqaleriartornissaat aqutissiuunneqartariaqarpoq.

8.5.

Aatsitassarsiornermi suliassaniluunniit nunaqavissut suliffeqarfiinit ingerlanneqarsinnaanngikkallartuni suliamik ingerlatsisussat nunaqavissunik sulisoqartarnissaannik ilinniartitsisarnissaannillu tamatigut naliginnaasumillu erseqqarissumik inatsisitigut piumasaaasiortoqartariaqarpoq.

8.6.

Nunatta pissarititai tunngavigalugit Nunatta iluani atortussiorsinnaaneq inuussutissanillu nioqqusiorsinnaaneq, pingaartumillu avammut nioqqutissiorsinnaaneq ineriartortinneqartariaqarpoq, tamatumani soorlu nersutaateqarneq, sermeq, imeq, ujaqqanik aatsitassanillu allanik atorluaasinnaaneq eqqarsaatigalugit.

9. Ilinniartitaaneq

9.1.

Inuusuttuaqqat meeqqat atuarfianni atuarnertik naammassisassavaat atuarsinnaanermikkut allassinnaanermikkullu, ilisimasassatigullu allatigut inuussutissarsiutini ilinniagaqalernissamut ima piukkunnarsarneqarsimatigissallutik, allaat ajornartorsiutiginaq ilinniagassaminnik aallartitsisinaanissaat nammassinninniarsinnaanerallu anguneqarsimassalluni.

9.2.

Meeqqat atuarfianni atuarnertup nalaani pisortanit isumagineqartumik nerisaqartitsinissaq eqqunneqartariaqarpoq.

9.3.

Inuusuttuaqqat meeqqat atuarfianni inuussutissarsiutitigullu ilinniarfinni inuttut immiut piuffigisinnanerup tungaatigut ineriartortinneqarnissaat pisariaqarpoq, inuiaqatigiinni ineriartortuni namminersulerniartunilu, allanik isumalluuteqarani, inuiaqatigiilli imminnut napatinnissaminnut isumalluutigalutik piukkunnarsaleruttorfianni peqataanerannik eqqaasittuarneqarnissaat siunertaralugu, kivitseqataasussaammata ilaqutariittullu imminnut napatinnialerumaarmata.

9.4.

Tamakku anguniakkat timitalerumallugit meeqqat atuarfianni ilinniarfinnilu atortussat, sulisut pikkorissartuarneqartut ilinniartitseriaatsillu ineriartuutaanerpaajusut atorneqartariaqarput, ingerlaavartumillu ilumut tamakku pigineqarnersut periaatsilluunniit pissusissamissut atorneqarnersut nalilersuivigineqartuartaqarput, ilinniartitsinermi inuusuttuaqqanik asuli katataqannginnissaq qulakkeerniarlugu.

9.5.

Meeqqat atuarfianni ilinniarfinnilu tamani kattuffeqarneq peqatigiiffeqarnerlu ilanngullugit ilinniartitsissutigineqartassapput. Tamatumani sulisartut kattuffii inuussutissarsiutillillu kattuffii eqqarsaatigalugit.

10. Ingerlatseqatigiiffissuit inuiaqatigiinnit pigineqartut

10.1.

Ingerlatseqatigiiffissuarni inuiaqatigiinnit pigineqartuni siunertaasariaqarpoq inuiaqatigiinnik kiffartuussinissaq, imaanngitsoq ingerlatseqatigiiffissuit iluminni imminnut "naalagaaffeeqqatut" ingerlatseqatigiiffillu pillugu aningaasarsiorfissatut ingerlanneqassasut. Ingerlatseqatigiiffissuit inuiaqatigiinnut pisussaaffilerneqarnertik aallaavigalugu kiffartuussisussaataassapput.

10.2.

Ingerlatseqatigiiffissuarni inuiaqatigiinnit pigineqartuni kiffartuussinerup akikillisarneqarlunilu pitsanngorsarneqarnerani suleriaatsinik eqaallisaanermi suliasat nunaqavissunit ilinniagaqqortuujunngitsunillu isumagineqarsinnaasut siulliullugit ikilisaavigineqartarnerat pinaveersarneqartariaqarpoq, tamanna tamatigut inuiaqatigiit aningaasarsiornerat tamakkiisumik isigalugu isumatusaarnertut taaneqarsinnaaneq ajormat.

10.3.

Ingerlatseqatigiiffissuit inuiaqatigiinnit pigineqartut sulisunik nunaqavissunik ilinniartitsisarnerat atuinerallu uuttuuserneqartariaqarpoq, ingerlatseqatigiiffissuit sanileriissillugit assersuunneqarsinnaalersillugit, taamatullu naalackersuinikkut piusasaqaatinik naammassinninnginnerusut piaarnerusumik naalackersuinikkut pisussaaffilipallanneqarsinnaanissaat siunertaralugu. Uuttuusersuinermut ilaasariaqarpoq ingerlatseqatigiiffissuup aqutsisoqarnermut aningaasartuutai, kiisalu atuisunut akigititaasa ukiuni tallimani kingullerni agguaqatigiissillugu qanoq qaffatsigisimanagerat, tamannalu sunik tunngaveqarnersoq.

10.4.

Ingerlatseqatigiiffissuit inuiaqatigiinnit pigineqartut namminersortunngorsarneqassanngillat namminersortunngorsarniaannarlugit. Namminersortunngorsaasoqassappat tamanna paatsuugassaannngitsumik kalaallillu eqqarsartaasiat tunngavigalugu nassuiarneqaaqartariaqarpoq isummorsorfigineqarlunilu. Namminersortunngorsaannissarlu pissutissaqarluarsorinarpat sanioqqunneqarsinnaanilu, taava ingerlatseqatigiiffissuaq nunaqavissunut namminersortunngorsartariaqarpoq.

PIFFISSAMI UNGASINNERUSUMI ANGUJUMASAT

11. Naalagaaffeqatigiinneq.

11.1.

Naalagaaffeqatigiinnerup iluani Kalaallit Nunaat 1979-imi namminersorneruler-mat namminersornerulernissamat Folketingip inatsisaa tunngaviuvoq, taannalu tunngavigalugu siornatigut naalagaaffiup oqartussaaffigisimasai Namminersorne-rullutik Oqartussanit ukiut ingerlanerini oqartussaaffigilerneqarsimapput.

11.2.

Nunamik piginnittusaanermut apeqqutip tamakkiisumik manna tikillugu Nammi-nersornerullutik Oqartussanit oqartussaaffigineqalinnginnera, taamaalillunilu inuiaqatigiit kalaallit tamakkiisumik nunamik piginnittuunerisa inatsisitigut suli naammassillugu inissinneqannginnera naammassillugu suliarineqartariaqarpoq.

11.3.

SIK isumaqarpoq Kalaallit Nunaata nunataa, imartaa silaannartaalu, tamakkunani-lu pisuussutit uumassusillit uumaatsullu tamakkiisumik inuiannit kalaaliusunit pigineqartut.

11.4.

Nunanut allanut tunngasutigut Namminersornerullutik Oqartussat sapinngisamik annertunerpaamik oqartussaaqataalernissaat angusariaqarpoq, tamatumanilu Qal-lunaat Naalackersuisuisa Namminersornerullutik Oqartussat sutigut tamatigut pe-qataasitsinissaat tunoqqutaarinianginnissaallu qulakkeertariaqarpoq.

11.5.

SIK-p Namminersornerullutik Oqartussanut piumasaraa, Naalagaaffimmut piuma-sarineqassasoq isumaqatigiissutigineqarlunilu Nunatta imartaani imaatigut silaan-nakkullu nakkutilliinermi kalaallinik inuusuttunik ilinniartitsisoqalissasoq peqa-taatitsisoqalissasorlu, imarsiornermi silaannakkullu nakkutilliineq Kangilinngua-niit ingerlanneqartoq eqqarsaatigalugu, Tunumilu Siriusip nakkutilliinera eqqar-saatigalugu.

11.6.

Taamatuttaaq Pituffimmi USA-p sakkutooqarfiani kalaallit sulisorineqartut amer-lisinniarlugit Pituffimmi sulianut immikkut ittunut ilinniarfissanik 100-nik piler-sitsisoqartariaqarpoq.

12. Qinersisarnermi inatsit.

12.1

Inuiaqatigiit qinersisarneranni, soorlu Inatsisartunut qinersinermi, Kommunalbestyrelsinit qinersinerni il.il tunngaviumillu inuiaat taasisinneqarneranni inuit Kalaallit Nunaanni ukiuni tallimani najugaqareersimasut qinersisinnaallutillu taasisinnaatitaapput.

13. Namminersulernissaq.

13.1.

Kalaallit Nunaata namminersulernissaa tamakkiisoq tunngaviatigut anguniarneqartariaqarpoq

13.2.

Kalaallit Nunaata namminersulernissaa tamakkiisoq pinngikkallartillugu, imaappoq Kalaallit Nunaat nunanit tamalaanit akuerisatut naalagaaffiulernissaa piviusunngunngikkallartillugu, Qallunaat Nunaannik naalagaaffeqatigeeriaaseq nutartartariaqarpoq, inuiaat kalaallit aningaasarsiornikkut, niuernikkut nunanullu allanut attaveqarnikkut ullumikkumut sanilliullugu kiffaanngissuseqarnerulersillugit, inuiattut imminut tamakkiisumik naalackersulersillugit.

13.3.

Namminersulernissap anguniarnerani SIK peqataajumavoq inuiaat kalaallit sutigut tamatigut piareersarneranni, pingaartumik ilinniartitaanerup, aningaasarsiornerup inuussutissarsiornerullu ineriartortinneqarneri eqqarsaatigalugit.

13.4.

Kalaallit Nunaat ukioq 2012-imi naalagaaffinngorsimassaaq. Kalaallit Nunaata naalagaaffinngornissaa SIK-p peqataaffigissavaa. Kalaallit Nunaatalu naalagaaffinngornissaata piareersarluarnissaa SIK-p peqataaffigittuinnassavaa.

SIK-p naalackersuinikkut anguniagai piffissami 2009-2013 ileqquusumik 2009-mi Qaqortumi ataatsimeersuarneranni akuersissutigineqarput. Taasisutigineqarnerini 34-it akuersipput, marluk akerliupput (2) arfineq pingasullu (8) taaseqataangillat.

Qaqortoq, 2. april 2009